



Inatsisartut Suleriaasianni § 36, imm. 1 naapertorlugu Naalackersuisunut apequt imaattoq matumuuna saqqummiuppara:

### **Naalackersuisunut apequt avataani saarullinniarnermi pisassiissutitut tunngasoq**

#### **Umiarsuaatileqatigiit saarullittassinneqarnikuusut**

1. Naalackersuisut pisassanik agguaaneranni takuneqarsinnaavoq, suliffeqarfinnut nutaanut pisassiisimasut.  
  
Suliffeqarfinnut nutaanut pisassiinerit tunngaveqarpat saarullittassat pisassaritinneqartut aalisariutaatileqatigiinnit pioreersunit aalisarneqarsinnaanngimmata kiisalu aalisariutaatikippallaarmata pisassiissutit pisarinissaannut?
2. Taamaattoqarsimassanngippat Naalackersuisut qinnuigissavakka sukumiisumik nassuiaasioqullugit suut toqqammaviit atorlugit kiisalu allaffissornikkut pissuseritinneqartut atorlugit agguasoqarsimanersoq, naatsorsuutigaarami inatsisit saniatigut saarullinniarnermut akuersissutinik tunniussinermut atatillugu Naalackersuisut allanit najoqquataqarsimassasut.
3. Sanilliussiniarnermut atatillugu Naalackersuisut aamma qinnuvigissavakka raajarniarnermi akuersissutinik tunniussisoqarnerani pisassiisoqarneranilu suut toqqammavigalugit kiisalu allaffissornikkut periutsit qanoq ittut atorneqartarnersut nassuiaaqqullugit.
4. Ingerlatseqatigiiffik nunaqavissunit pigineqaraluarluni ingerlatseqatigiiffiup pigisai tamangajammik nunami allami peqataasumit pigineqarpata Naalackersuisunit isigineqarpa ingerlatseqatigiiffittut nunaqavissutut? Taamatut aaqquissuussineq ulluinnarni pineqartarpoq piginnittuusaarnermik, ingerlatseqatigiiffiup pigisai nunanit allameersumit pigineqarmata.
5. Imaannerpa ingerlatseqatigiiffeqartoq ataatsimmik arlalinnilluunniit 2008 saarullittassinneqarsimasunik taamatut aaqquissuusinnikkut pigineqartunit ingerlanneqartunillu?
6. 2008-mi avataani saarullinniarnissamat akuersissutinik umiarsuaatileqatigiit qassit tunineqarsimanersut pillugit Naalackersuisut tullerriartumik nalunaarsuusianik takussutissanik qinnuigineqarput. Takutitassiami aalisariutaatileqatigiit aqqi, aalisariutit qanoq ittut qanorlu angitiginersut kiisalu pisassiissutit annertussusaat.
7. Kikkut aamma qanoq amerlatigisut aalisariutaatileqatigiit 2008-mut saarullittassanik qinnuteqarsimagaluarpat?. Akissut tullerriartumik nalunaarsuusiaralugu takussutissiareqquneqarpoq.
8. Greenland Venture ingerlatseqatigiiffinni saarullittassinneqarsimasuni ilaava?

- a. aamma qanoq annertutigisumik (peqataatinneqarpa).
  - b. Greenland Venturep peqataanera aningaasaateqarfiup pilersinneqarnerani siunertaasunut naalackersuinikkullu kissaatigisanut naleqquttutut tulluurtuusutullu Naalackersuisunit isumaqarfigineqarpa?
  - c. Taamaattoqassappat nassuiaqquneqarpoq Naalackersuisut isumaat naapertorlugu taamatut peqataatitsineq Greenland Venturep siunertaanut naapertuunnersoq, tamanna malillugu ineriartortinniarneqartunut tunngavigineqartut imaammata:
    - Inuussutissarsiorneq arlalinnik periarfissalik
    - Annertusaanermut periarfissalik
    - Aningaasatigut ingerlalluortoq
9. Naalackersuisut isumaqarpat saarullittassat pisarineqarsinnaasut aalisartitseqatigiit nunatsinnersut nammineerlutik pisarisinnaanngikkaat?

### **Umiarsuaatileqatigiit ataasiakkaat piginnittoqarnermik aqqissuussaanerat**

#### **Tunumi Tsuuddii A/S & North Greenland Seafood Aps il.il.**

10. Naalackersuisunit ilisimatitsissutigeqquneqarpoq sooq Tunumi Tsuuddii A/S ingerlatseqatigiiffittut aktieselskabitut Naalackersuisunit isiginiarneqarsinnaanersoq, paasissutissat pissarsiarineqarsinnaasut tunngavigalugit suliluunniit CVR-imi pilersinneqarsimangitsutut takuneqarsinnaanngimmat?
  11. Qanoq Tunumi Tsuuddii A/S pisassinneqarsinnaava umiarsuaateqanngikkaluarluniluunniit?
  12. “ngerlatseqatigiiffik ammanngitsoq” Aps KBUS 38 nr. 3117 nalunaarsorneqarsimavoq North Greenland Seafood Aps-mik pilersitsisutut.
- Aps KBUS 38 nr. 3117-mi inuit kikkut tunuliaqutaanersut kiisalu Kalaallit Nunaannut attuumassuteqarnerisut Naalackersuisut qinnuigineqarput allaqqullugit nalunaarsuutigeqqullugillu.
13. Ilinniartitaanermut aamma suliffissaqartitsinnermut atatillugu ingerlatseqatigiiffiit taakku marluusut naammaginarumik tunniussisinnaanersut pillugit Naalackersuisut piffissamik killiliippat aamma sunik aalajangersimasunik suliniuteqarnissamik piumasaqaateqarpat?
  14. Naalackersuisut qinnuigissavakka allakkiap suliffeqartitsiniarnermik ilinniartitsinissamillu piumasaqaatitaqartumik imallit imaluunniit ilaanik nuutinnerinik imaqtartumik nassiusseqqullugit, piumasaqaatit qanoq piviusunngortinniarneqarneranik qulakkeerinnittumik.
  15. Kalaallit Nunaanni aalisartoorersut ukiorpassuarnilu nunatsinni aningaasarsiornikkut pingaarnertut napatitsisuusimasut siunissami qanoq atugassaqtinneqarnissaat Naalackersuisunit takorlorneqarpa?, tassami Naalackersuisut Aningaasaqarnikkut ingerlatsineq pillugu nalunaarut 2008-mi nalunaarutigimmassuk ineriartortitsiniarneq ilumoorullugu, tassa kalaallit aalisartui aalisarnermiit nunami aatsitassarsiornermut nussorneqassasut.
- (Inatsisartunut ilaasortaq Ane Hansen, Inuit Ataqtigiit)

#### **Tunngavilersuut:**

Ilisimaneqartut avataasiorluni saarullinniarnermi akuersissutinik tunniussisarnermi Naalackersuisunit pissutsit iliuuserisartakkallu pillugit Naalackersuisut apeqquteqarfiginikuuakka. Isumaqarpunga

taamani Naalakkersuisunit akissutigineqartoq naammanngitsoq. Taamaattumik apeqqutimma ilanisaannut pissutissaqarpunga.

Aalisarnermut inatsimmi § 6 naammassineqarsimanngimmat aammattaaq immikkut ittumik akuersissuteqarnissamut § 6, imm. 6 naammassineqarsimanngimmat, pisassiinermilu nunniusisussaataaneq ilaangimmat ingerlatseqatigiiffinnut atuutinngitsunut pisassiisimanerit Inuit Ataqatigiit inatsisinik unioqqutitsinertut isigivaat.

Inuit Ataqatigiit ineriartorneq taamatut ittoq ernumanartoqartippaat, kalaallit aalisartui nunami allamiunut isiginnaartuinnartut naggataatigut inissisimaleratarsinnaammata.